



**PARLAMENTARNA SKUPŠTINA
BOSNE I HERCEGOVINE**

307

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na sjednici Predstavničkog doma, održanoj 9. juna 2004. godine, i sjednici Doma naroda, održanoj 29. juna 2004 godine, usvojila je

ZAKON

O OSNIVANJU INSTITUTA ZA INTELEKTUALNO VLASNIŠTVO BOSNE I HERCEGOVINE

I - OSNOVNE ODREDBE

Član 1.

1. Ovim zakonom osniva se Institut za intelektualno vlasništvo Bosne i Hercegovine (u daljem tekstu: Institut) kao samostalna državna upravna organizacija, uređuje njegov položaj, nadležnost i ovlaštenja, kao i druga pitanja od značaja za organizaciju, funkcioniranje i rad Instituta.
2. Institut preuzima poslove u području zaštite intelektualnog vlasništva koji su utvrđeni Zakonom o osnivanju Instituta za standarde, mjeriteljstvo i intelektualno vlasništvo Bosne i Hercegovine ("Službeni glasnik BiH", br. 29/00 i 19/01), u skladu s ovim zakonom.

Član 2.

1. Institut obavlja, u okviru djelokruga utvrđenog ovim zakonom, upravne i druge stručne poslove u okviru prava i dužnosti državnih upravnih organizacija, ako ti poslovi nisu stavljeni u nadležnost drugih državnih organizacija, odnosno ako nisu zakonom povjereni drugim organizacijama.
2. Institut provodi nadzor nad izvršavanjem zakona i drugih propisa iz nadležnosti Instituta na teritoriji Bosne i Hercegovine, ako drugim propisom nije drukčije uređeno.
3. Bosna i Hercegovina, putem Instituta, ostvaruje članstvo i saradnju s odgovarajućim međunarodnim institucijama i sa sličnim nacionalnim institucijama u području intelektualnog vlasništva. Saradnja s

međunarodnim institucijama ostvaruje se putem članstva, javne komunikacije, razmjene dokumentacije, tehničke pomoći, edukacije i drugim oblicima zavisno od prirode i načina njenog ostvarivanja.

Član 3.

1. Institut ima svojstvo pravnog lica.
2. Sjedište Instituta je u Mostaru.

Član 4.

1. Rad Instituta dostupan je javnosti.
2. Javnost rada Instituta može se ograničiti ili isključiti samo u slučajevima utvrđenim zakonom.
3. Institut osigurava jednak položaj svim strankama u skladu sa Zakonom o upravnom postupku ("Službeni glasnik BiH", broj 29/02).
4. U Institutu se osigurava odgovarajuća nacionalna zastupljenost državnih službenika i zaposlenika u skladu sa zakonom.

Član 5.

1. Institut ima pečat, koji je izrađen u skladu sa Zakonom o pečatu institucija Bosne i Hercegovine ("Službeni glasnik BiH", br. 12/98 i 14/03).
2. Na zgradi u kojoj je smješten Institut mora biti istaknut naziv Instituta i državni grb.
3. Naziv Instituta mora biti ispisan na bosanskom, hrvatskom i srpskom jeziku, i latiničnim i ćirilničnim pismom.

Član 6.

1. U Institutu su u ravnopravnoj upotrebi službeni jezici: bosanski, hrvatski i srpski.
2. Službena pisma su ćirilica i latinica.
3. U postupku pred Institutom mogu se koristiti i drugi jezici koji nisu u službenoj upotrebi.

II - NADLEŽNOST INSTITUTA

Član 7.

Institut je nadležan za obavljanje stručnih i upravnih poslova u području intelektualnog vlasništva i to za:

- a) područje zaštite industrijskog vlasništva,
 - b) područje zaštite autorskih i srodnih prava,
 - c) područje zaštite intelektualnog vlasništva.
- aa) Poslovi u području zaštite industrijskog vlasništva odnose se na:
- vođenje upravnog postupka za sticanje, održavanje, promet i prestanak prava na patent, robni i uslužni žig, industrijski dizajn i geografsku oznaku, u skladu s odredbama međunarodnih konvencija, ugovora i sporazuma

kojima je pristupila, odnosno koje je ratificirala Bosna i Hercegovina i zakona i provedbenih propisa kojima se uređuje ova materija,

- upravne poslove koji se odnose na zaštitu topografije integriranih kola (Layout-Designs).

bb) Poslovi u području zaštite autorskih i srodnih prava odnose se na:

- upravne i stručne poslove koji se odnose na prava autora na djelima iz područja književnosti, nauke, umjetnosti, prava umjetnika izvođača fonograma, prava organizacija za radiodifuziju, prava proizvođača videograma i baza podataka, u skladu s odredbama međunarodnih konvencija, ugovora i sporazuma kojima je pristupila, odnosno koje je ratificirala Bosna i Hercegovina i zakona i provedbenih propisa kojima se uređuje ova materija,
- nadzor nad radom udruženja za kolektivno ostvarivanje autorskih prava.

cc) Poslovi u području zaštite intelektualnog vlasništva obuhvataju i sljedeće:

- informacijsko-dokumentacijske poslove u skladu sa standardima predloženim od Svjetske organizacije za intelektualno vlasništvo (WIPO/OMPI) i u skladu s odredbama zakona i provedbenih propisa kojima se uređuje područje intelektualnog vlasništva,
- pripremanje bilateralnih i multilateralnih sporazuma, konvencija, aranžmana, zakona i drugih propisa iz područja intelektualnog vlasništva,
- poslove u cilju ostvarivanja međunarodne saradnje s odgovarajućim institucijama drugih zemalja kao i s međunarodnim organizacijama u području intelektualnog vlasništva osnovanim na svjetskom, regionalnom ili drugom nivou,
- publicističku djelatnost u području intelektualnog vlasništva,
- i druge upravne i stručne poslove u okviru svoje nadležnosti u skladu s aktima državnih institucija.

III - UNUTRAŠNJA ORGANIZACIJA

Član 8.

1. Unutrašnja organizacija Instituta zasniva se na principima utvrđenim Zakonom o upravi ("Službeni glasnik BiH", broj 32/02) i Zakonom o državnoj službi u institucijama Bosne i Hercegovine ("Službeni glasnik BiH", br. 19/02 i 35/03).
2. Institut će uspostaviti ispostave u oba entiteta, kao organizacione jedinice, koje će obavljati poslove iz oblasti zaštite industrijskog vlasništva utvrđene članom 5. stav 1. Zakona o industrijskom vlasništvu u BiH ("Službeni glasnik BiH", broj 3/02).
3. Unutrašnja organizacija Instituta uređuje se Pravilnikom o unutrašnjoj organizaciji, koji donosi direktor Instituta uz saglasnost Vijeća ministara Bosne i Hercegovine.

IV - RUKOVODENJE INSTITUTOM

Član 9.

1. Institutom rukovodi direktor.
2. Direktor predstavlja i zastupa Institut, odgovoran je za obavljanje posebnih zadataka utvrđenih odlukama Vijeća ministara Bosne i Hercegovine, organizira i osigurava zakonito i efikasno obavljanje poslova, donosi propise kada je za to zakonom Bosne i Hercegovine ovlašten, izdaje druge akte za koje je ovlašten i poduzima druge mjere iz nadležnosti Instituta te odlučuje, u skladu sa zakonom Bosne i Hercegovine, o pravima, obavezama i odgovornostima državnih službenika i zaposlenika u vršenju službe.
3. Direktor Instituta ima zamjenika, koji ga zamjenjuje ukoliko on nije u mogućnosti izvršavati svoja ovlaštenja i obaveze.

4. Direktora i zamjenika direktora imenuje Vijeće ministara Bosne i Hercegovine, po prethodno pribavljenom mišljenju Agencije za državnu službu, u skladu sa Zakonom o upravi ("Službeni glasnik BiH", broj 32/02).

5. Mandat direktora i zamjenika direktora traje pet godina i može se produžiti za još pet godina, tako da najduži period postavljanja na isto radno mjesto traje deset godina.

6. Direktor i zamjenik direktora obavezni su, na osnovu Ustava, zakona, drugih propisa i smjernica Vijeća ministara Bosne i Hercegovine, savjesno vršiti povjerenu dužnost i lično su odgovorni za njihovo izvršenje, kao i za rad Instituta.

Član 10.

Rukovodeći državni službenici pomažu direktoru i zamjeniku direktora u rukovođenju pojedinim područjima rada.

Član 11.

1. Direktor Instituta dužan je za svaku godinu donijeti program rada i podnijeti izvještaj o radu.

2. Program rada i izvještaj o radu podnose se Vijeću ministara Bosne i Hercegovine na način i po postupku utvrđenom Zakonom o ministarstvima i drugim organima uprave Bosne i Hercegovine ("Službeni glasnik BiH", br. 5/03 i 42/03).

V - DRŽAVNI SLUŽBENICI I ZAPOSLENICI

Član 12.

1. Poslove osnovnih djelatnosti, koji su ovim zakonom stavljeni u nadležnost Instituta, obavljaju državni službenici koji se postavljaju na radna mjesta utvrđena Zakonom o državnoj službi u institucijama Bosne i Hercegovine ("Službeni glasnik BiH", br. 19/02 i 35/03).

2. Kategorije u okviru radnih mjesta koje obavljaju državni službenici utvrđuju se Pravilnikom o unutrašnjoj organizaciji Instituta.

3. Postavljenja državnih službenika na radna mjesta u Institutu, njihova prava, obaveze i odgovornosti i druga statusna pitanja, plaće i druga materijalna primanja državnih službenika, kao i sprečavanje sukoba interesa u obavljanju dužnosti državnih službenika uređuju se u skladu sa Zakonom o državnoj službi u institucijama BiH ("Službeni glasnik BiH", br. 19/02 i 35/03) i drugim posebnim zakonom.

4. Pomoćno-tehničke poslove u Institutu obavljaju zaposlenici, u skladu s važećim propisima.

5. Prijem zaposlenika u radni odnos, prava, obaveze, odgovornosti i druga statusna pitanja, kao i plaće i druga materijalna primanja zaposlenika, uređuju se u skladu s posebnim zakonom.

VI - SREDSTVA ZA FINANSIRANJE INSTITUTA

Član 13.

1. Institut se finansira iz budžeta Bosne i Hercegovine. Institut učestvuje u prihodu budžeta Bosne i Hercegovine sa sredstvima koje ostvaruje pružanjem usluga iz svoje djelatnosti i sredstvima na ime naknade po osnovu članstva u međunarodnim organizacijama i drugim institucijama u području intelektualnog vlasništva.

2. Sredstva za rad Instituta iskazuju se u budžetu, koji donosi Parlamentarna skupština Bosne i Hercegovine.

3. Sredstva za rad Instituta čine: sredstva za plaće i naknade, sredstva za materijal i usluge, kapitalni izdaci i sredstva za programe posebne namjene.

4. Sredstva iz budžeta Bosne i Hercegovine osiguravaju se u skladu sa Zakonom o izvršenju budžeta institucija Bosne i Hercegovine.

5. Direktor Instituta je naredbodavac za pripremu predračuna budžetskih sredstava i izvršenje finansijskog plana Instituta.

VII - PRIJELAZNE I ZAVRŠNE ODREDBE

Član 14.

1. Institut za standarde, mjeriteljstvo i intelektualno vlasništvo Bosne i Hercegovine, koji je osnovan Zakonom o osnivanju Instituta za standarde, mjeriteljstvo i intelektualno vlasništvo Bosne i Hercegovine ("Službeni glasnik BiH", br. 29/00 i 19/01), prestaje s radom nakon isteka 60 dana, računajući od dana davanja saglasnosti Vijeća ministara Bosne i Hercegovine na Pravilnik o unutrašnjoj organizaciji Instituta.

2. Zajednička komisija koju imenuje Vijeće ministara Bosne i Hercegovine, a sačinjavaju je predstavnici Instituta za standarde, mjeriteljstvo i intelektualno vlasništvo Bosne i Hercegovine i predstavnici novoosnovanih Instituta u skladu s članom 13. stav 3. Zakona o osnivanju Instituta za standarde, mjeriteljstvo i intelektualno vlasništvo Bosne i Hercegovine ("Službeni glasnik BiH", br. 29/00 i 19/01), (Institut za intelektualno vlasništvo Bosne i Hercegovine, Institut za standardizaciju Bosne i Hercegovine i Institut za mjeriteljstvo Bosne i Hercegovine), odredit će način preuzimanja i raspoređivanja poslova, opreme, arhive i novčanih sredstava i preuzimanja državnih službenika i zaposlenika, koji se u tom svojstvu zateknu u Institutu za standarde, mjeriteljstvo i intelektualno vlasništvo Bosne i Hercegovine na dan stupanja na snagu ovog zakona.

3. Institut za intelektualno vlasništvo Bosne i Hercegovine preuzima poslove, opremu, arhivu i novčana sredstava i državne službenike i zaposlenike danom potpisivanja zapisnika o izvršenoj primopredaji, sačinjenog od Komisije iz stava 2. ovog člana a u skladu s Odlukom o načinu preuzimanja poslova između ministarstava osnovanih ranijim Zakonom o Vijeću ministara Bosne i Hercegovine i ministarstvima Bosne i Hercegovine i ministarstava osnovanih Zakonom o ministarstvima i drugim organima uprave Bosne i Hercegovine ("Službeni glasnik BiH", broj 15/03).

Član 15.

1. Direktor Instituta za intelektualno vlasništvo Bosne i Hercegovine donijet će Pravilnik o unutrašnjoj organizaciji Instituta najkasnije u roku od 60 dana računajući od dana imenovanja na mjesto direktora.

2. Raspoređivanje državnih službenika i zaposlenika na odgovarajuće poslove i zadatke, u skladu s Pravilnikom iz stava 1. ovog člana, izvršit će se najkasnije u roku od 30 dana računajući od dana donošenja Pravilnika o unutrašnjoj organizaciji Instituta.

Član 16.

1. Direktor Instituta, pomoćnici direktora i drugi rukovodni radnici Instituta za standarde, mjeriteljstvo i intelektualno vlasništvo Bosne i Hercegovine obavljaju svoje poslove do okončanja redovne zakonske procedure izbora na rukovodna mjesta u skladu sa ovim zakonom i Pravilnikom o unutrašnjoj organizaciji Instituta.

2. Prava rukovodnih radnika koji su stavljeni na raspolaganje rješavaju se u skladu sa Zakonom o državnoj službi u institucijama Bosne i Hercegovine i Pravilnikom o radnim odnosima Instituta.

Član 17.

Sva rješenja, odluke i ostala akta u području intelektualnog vlasništva, koje je donio Institut za standarde, mjeriteljstvo i intelektualno vlasništvo Bosne i Hercegovine do dana stupanja na snagu ovog zakona, ostaju na snazi, dok u zakonskoj proceduri ne budu zamijenjeni.

Član 18.

Ovaj zakon stupa na snagu osmog dana od dana objavljivanja u "Službenom glasniku BiH", a objavit će se u službenim glasilima entiteta i Brčko Distrikta Bosne i Hercegovine.

PSBiH broj 81/04
29. juna 2004. godine
Sarajevo

Predsjedavajući
Predstavničkog doma
Parlamentarne skupštine BiH
Martin Raguž, s. r.

Predsjedavajući
Doma naroda
Parlamentarne skupštine BiH
Goran Milojević, s. r.
